

**SPORAZUM O SARADNJI**  
Grada Zenice i Udruženja Eko forum Zenica

**Član 1**

**(Osnov za zaključenje i predmet sporazuma)**

- (1) Sporazum o saradnji Grada Zenice i udruženja Eko forum Zenica (u daljnjem tekstu Sporazum) je dokument kojim se utvrđuju zajedničke vrijednosti, principi, načela i prioriteti saradnje između Grada Zenice (u daljnjem tekstu Grad) i udruženja Eko forum Zenica (u daljnjem tekstu Udruženje).
- (2) Osnov za zaključenje ovog Sporazuma proizilazi iz Strategije o partnerstvu između Općine Zenica i građana od 2008. godine.
- (3) Izrazi koji se u ovom Sporazumu koriste u muškom rodu obuhvataju iste izraze u ženskom rodu.

**Član 2**

**(Strane potpisnice Sporazuma)**

- (1) Strane potpisnice Sporazuma su Grad i Udruženje.
- (2) Za realizaciju Sporazuma u ime Grada odgovoran je Gradonačelnik za vrijeme trajanja svog mandata.
- (3) Za realizaciju Sporazuma u ime Udruženja odgovoran je predsjednik udruženja, odnosno ovlaštena osoba u skladu sa Statutom Udruženja.
- (4) Za komunikaciju u vezi realizacije odredbi Sporazuma ovlaštene su osobe iz stavova (2) i (3) ovog Sporazuma.

**Član 3**

**(Zajednička vizija)**

- (1) Strane potpisnice Sporazuma iskazuju opredijeljenost za izgradnju lokalne zajednice u kojoj je ostvareno pravo na čist okoliš kao osnovno ljudsko pravo.
- (2) Strane potpisnice Sporazuma saglasne su da će primjenom Arhuške konvencije, zagovarati i inicirati promjene u Zenici, Zeničko-dobojskom kantonu i Bosni i Hercegovini s ciljem postizanja visokih standarda zaštite okoline i principa održivog razvoja.

**Član 4**

**(Principi saradnje)**

- (1) Strane potpisnice saglasne su da aktivnosti organizacija civilnog društva koje se bave zaštitom okoliša, a kojima se promoviraju i štite javni i legitimni privatni interesi, čine sastavni dio prosperitetnog, pravičnog, otvorenog, pluralnog i demokratskog društva.
- (2) Strane potpisnice uvažavaju različite, ali komplementarne uloge i odgovornosti predstavničke i participativne demokratije u izgradnji prosperitetnog, pravičnog, otvorenog, pluralnog i demokratskog društva.
- (3) Saradnja strana potpisnica u primjeni Sporazuma zasniva se na strukturalnom dijalogu, uvažavajući načela otvorenosti, ravnopravnosti i argumentovanog iznošenja i zastupanja stavova u definisanju zajedničkih ciljeva i prioriteta saradnje.

- (4) Prioriteti saradnje su borba za zdrav okoliš, uz uvažavanje principa održivog razvoja i balansa između ekonomskog prosperiteta i zaštite okoliša i ljudskog zdravlja, participativna demokratija zaštite okoliša, transparentnost i poštivanje zakona.

## **Član 5**

### **(Obaveze Grada Zenice)**

- (1) Grad će stvarati podsticajno okruženje za razvoj civilnog društva na području Zenice.
- (2) Grad će nastaviti aktivnosti na unapređenju institucionalnih mehanizama saradnje s civilnim društvom i s uključivanjem građana i nevladinih organizacija u sve faze kreiranja i primjene javnih politika koje se tiču zaštite okoliša, a koje su u nadležnosti Grada.
- (3) Grad će nastaviti transparentno finansiranje programa i projekata zaštite okoliša koje u Zenici provodi Udruženje, samostalno ili u saradnji s drugim domaćim, stranim ili međunarodnim organizacijama civilnog društva.
- (4) Grad će omogućiti blagovremeno i participativno učešće javnosti u donošenju svih odluka iz svoje nadležnosti, a koje se tiču zaštite okoliša, ili koje mogu imati utjecaj na okoliš: izdavanje dozvola, usvajanje strateških, planskih i razvojnih dokumenata, donošenje propisa i sl. Pod učešćem javnosti podrazumijeva se da se argumentovane sugestije i primjedbe iz javnih rasprava koje Udruženje uputi u procesu donošenja odluka ozbiljno razmotre i prihvate, a ukoliko nisu prihvatljive da se adekvatno obrazlože razlozi neprihvatanja.
- (5) Grad će obezbijediti uslove za normalno funkcioniranje Arhus centra Zenica – obezbjeđenjem prostora i prateće infrastrukture za djelovanje Arhus centra, kao mjesta na kojem se građani mogu informisati o svim pitanjima zaštite okoliša u Zenici, i putem kojeg mogu ostvariti svoja prava garantovana Arhuškom konvencijom (pravo na pristup informacijama, na učešće u odlučivanju i pristup pravosuđu po pitanjima zaštite okoliša).
- (6) Grad i gradska uprava neće ograničavati javno iznošenje stavova Udruženja i informacija o stanju okoliša u Zenici, ukoliko su te informacije utemeljene na činjenicama.

## **Član 6**

### **(Obaveze Udruženja Eko forum Zenica)**

- (1) Udruženje će nastaviti napore na jačanju svojih kapaciteta za učestvovanje u procesima kreiranja i primjene javnih politika u oblasti zaštite okoliša, dajući time doprinos njihovom kvalitetu i uspješnoj realizaciji.
- (2) Udruženje će pravovremeno i transparentno informisati javnost o svojim aktivnostima, prikupljenim informacijama i interesima koje zastupaju u borbi za zdrav okoliš.
- (3) Udruženje će u interesu javnosti, korisnika njihovih programa, projekata i donatora, transparentno upravljati dodijeljenim javnim i drugim donatorskim sredstvima, i razvijati mehanizme samoregulacije koji doprinose ovoj praksi.
- (4) Udruženje će pružati savjetodavnu i stručnu podršku Gradu po pitanjima koja se tiču zaštite okoliša ili drugim pitanjima koja mogu imati negativan utjecaj na okoliš i ljudsko zdravlje.
- (5) Udruženje će učešćem u lokalnim, regionalnim i međunarodnim mrežama, kontaktima s međunarodnim organizacijama i institucijama, te na druge načine promovisati interese građana Zenice u ostvarivanju strateških ciljeva Zenice po pitanjima zaštite okoliša.

**Član 7**  
**(Rješavanje sporova)**

- (1) Svaki spor, kontroverza ili zahtjev koji proizilazi ili je u vezi sa Sporazumom bit će rješavani sporazumno ili na drugi način, kako se dogovore strane potpisnice.

**Član 8**  
**(Završne odredbe)**


- (1) Sporazum je izrađen uz potpuno razumijevanje strana potpisnica i nadilazi sve prethodne dogovore, pisane ili usmene, a koje su predmet Sporazuma.
- (2) Sporazum se zaključuje na neodređeno vrijeme, a stupa na snagu danom njegovog potpisivanja.
- (3) Strane potpisnice mogu raskinuti Sporazum u bilo koje vrijeme, dostavljajući prethodnu pisanu obavijest u vremenskom roku od 30 dana.
- (4) Strane potpisnice pozivaju i druge nivoe vlasti i nevladine organizacije da zajednički rade na unaprjeđenju međusobne saradnje, u duhu principa ovog Sporazuma, teu skladu sa zakonom utvrđenim nadležnostima.

02-45-2465/11

U Zenici, 14. 02. 2021. godine

Gradonačelnik Grada Zenice

*AK*  
Fuad Kasumović



Br. protokola : 21/21

Predsjednik Udruženja Eko forum Zenica

Zlatan Alibegović

*Zlatan Alibegović*



25.02.2021.